

Evening Dogri (NSD)

Bulletin 25-06-2024

आकाशवाणी

खबरां

- भारतीय जनता पार्टी दे सीनियर सांसद ओम बिरला होरें गी एनडीए भेठा जिल्लै के कांग्रेस दे सांसद के. सुरेश होरें गी आई.एन.डी.आई गठबंधन बक्खियां स्पीकर दे ओहदे लेई नामजद कीता गेआ ऐ।
- प्रधानमंत्री नरेंद्र मोदी होरें 1975 दे इमरजेंसी दा विरोध करने आहले सब्बने महान लोके गी नमन कीता ऐ।
- 18मीं लोकसभा दे पैहले इजलास दे दुए ध्याड़े केई नमें चुनोए दे सांसदे अज्ज सगंध लैती।
- उपभोक्ता मामले, खुराक ते सार्वजनिक बंड सरबन्धी केंद्री मंत्री प्रहलाद जोशी होरें गन्ने दे टिकाऊ ते विविध उत्पादन लेई कुल संसारी सहयोग लेई आहवान कीता।
- उप-हिमालयन पच्छिम बंगाल ते सिक्किम च अज्ज बेहद भारी बरखा पौने दी मेद ऐ।

<><><><><><>

LS-Speaker

भारतीय जनता पार्टी दे वरिष्ठ सांसद ओम बिरला पिछली लोकसभा बी अध्यक्ष हे ते इस बारी बी राष्ट्रीय जनतांत्रिक गठबंधन एनडीए नै अध्यक्ष दे ओहदे लेई

उनेंगी अपना मेदवार बनाया ऐ। तोआई विपक्ष दे इंडी गठबंधन नै इस ओहदे लेई कांग्रेस दे सांसद के. सुरेश होरें गी अपना मेदवार बनाया ऐ। दौनें मेदवारें अध्यक्ष दे ओहदे आस्तै अपना-अपना नामांकन भरेआ। अध्यक्ष दा चुनां कल होग। एहदे थवां पैहले सरकार ते विपक्ष इस ओहदे आस्तै आम सहमति तगर पुज्जने च असफल रए हे। संसद दे बाहरें मीडिया कन्नै गल्लबात च केंद्री मंत्री पीयूष गोयल होरें आखेआ जे वरिष्ठ केंद्री मंत्री राजनाथ सिंह, अमित शाह ते जगत प्रकाश नड्डा होरें इस मुद्दे पर कांग्रेस नेता के.सी वेणुगोपाल ते डीएमके दे नेता टी.आर बालू हुंदे कन्नै बैठक कीती। विपक्ष दे नेता बिरला हुंदी मदवारी पर समर्थन देने थवां पैहले उपाध्यक्ष दे नां दी घोषणा करने पर जोर देआ रदे हे। गोयल होरें आखेआ जे उनेंगी सूचित करी दिता गेआ ऐ जे उपाध्यक्ष दा मुद्दा एहदे चुनां दे बेल्ले नबेड़ेया जाग। उनें आखेआ जे विपक्ष शर्ता रक्खा'रदा ऐ जे जिसी सरकार खारिज करी चुकी दी ऐ। एहदे थवां पैहले कांग्रेस दे सांसद राहुल गांधी होरें आखेआ जे विपक्ष अध्यक्ष दे मेदवार गी अपना समर्थन देने आस्तै त्यार ऐ पर उपाध्या ओहदे पर विपक्षी पार्टी दा मेदवार होना लोड़चदा। संसद परिसर च मीडिया गी जानकारी दिंदे होई गांधी होरें आखेआ जे राजनाथ सिंह होरें मल्लिकार्जुन खड़गे हुंदे कन्नै मलाटी करिए उनेंगी अध्यक्ष गी अपना समर्थन देने लेई गलाया। गांधी होरें आखेआ जे खड़गे होरें दस्सेया जे विपक्ष एनडीए दे अध्यक्ष दे मेदवार गी अपना समर्थन देने लेई प्यार ऐ पर रिवायत मुजब उपाध्यक्ष दा ओहदा विपक्ष दा होना लोड़चदा।

## PM-Emergency

प्रधानमंत्री नरेंद्र मोदी हों 1975 आली इमरजेंसी दा विरोध करने आहले महान लोकें गी श्रद्धांजलि भेंट कीती। इक सोशल मीडिया पोस्ट च मोदी हों आखेआ जे एह दिन चेत्ता दोआंदा ऐ जे कियों कांग्रेस पार्टी नै बुनियादी आजादी गी नष्ट करी दिता ते भारत दे संविधान गी जिसदा हर भारती बड़ा सम्मान करदा ऐ, उसी मींदिए रक्खी दिता। उनें आखेआ जे उसलै दी कांग्रेस सरकार नै सब्बनें लोकतांत्रिक सिद्धांतें गी पिच्छे रक्खी दिता ते मुख्य गी जेल बनाई दिता। मोदी हों आखेआ जे जिनें लोकें इमरजेंसी लाई, उनेंगी संविधान प्रति प्यार जताने दा कोई अधिकार नैई। उनें आखेआ जे एह उये लोक न जिनें केई सारे मौकें पर दफा 356 लाई। प्रेस दी आजादी गी नष्ट करने आस्तै विधेयक आंदे। संघवाद गी नष्ट कीता ते संविधान दे हर पैहलु दा उल्लंघन कीता। प्रधानमंत्री हों आरोप लाया जे जिस मानसिकता करी आपातकाल लाया गेआ ओह मानसिकता उस पार्टी दी अज्ज बी जिंदा ऐ।

<><><><><><><><>

## Nadda-Emergency

केंद्री मंत्री ते भाजपा अध्यक्ष जगत प्रकाश नड्डा हों कांग्रेस पर निशाना लांदे होई आखेआ जे कांग्रेस दी सोच समझ ओदे कम्म करने दे तरीके च लोकतंत्र लेई कोई थाहर नैई ऐ। भाजपा अध्यक्ष 1975 च लाई गेदी इमरजेंसी बारे बोलदे होई नड्डा हों आखेआ जे इस चीज नै मुख्य दे लोकतंत्र दे हर थम्म गी हिलाइये रक्खी दिता। उनें आखेआ जे कांग्रेस नै डॉ. बी.आर अम्बेडकर हुंदे आस्सेआ दिते गेदे संविधान दा गला घोटने दी कोशिश कीती। अपने इक सोशल

मीडिया पोस्ट च नड्डा होरें आखेआ जे अज्ज जेडे भारत दे संविधान दे रक्षक होने दा दावा करा'रदे न, उनें संवैधानिक मुल्लें दी राक्खी लेई अपनी आवाज चुक्कने आलें गी दबाने च कोई कसर बाकी नेई छोड़ी।

<><><><><><>

### LS-Oath

18मीं लोकसभा दे पैहले सत्र दे दुए ध्याड़े बी केई नमें चुने गेदे सांसदें सगंध लैती। महाराष्ट्र थमां सगंध लैने आले प्रमुख सांसदें च एनसीपी शरद पवार दी सुप्रिया सुले ते अमोल खोले, शिवसेना शिंदे गुट दे डॉ. श्रीकांत शिंदे, भाजपा सांसद नारायण राणे ते शिवसेना उद्धव बाला साहेब ठाकरे दे अरबिंद सावंत शामिल न। पंजाब थमां साबका मुखमंत्री ते कांग्रेस सांसद चरणजीत सिंह चन्नी, शिरोमणि अकाली दल दिआं हरसिमरत कौर बादल हुंदे अलावा ओडिशा थमां भारतीय जनता पार्टी दे संबित पात्रा, बैजयंत पांडा ते प्रताप चंद्र सारंगी होरें सगंध चुक्की। मणिपुर थमां कांग्रेस सांसद अल्फ्रेड बिमोल अकोइजाम होरें बी अज्ज दपैहरी शपथ लैती, राजस्थान थमां भारतीय जनता पार्टी दे सांसद हरीश चंद्र मीणा, आरएलपी दे हनुमान बेनीवाल होरें सगंध लैती। सांसदें अज्ज हिंदी, उर्दू ते अंग्रेजी दे अलावा पंजाबी, मराठी, उड़िया, तमिल सनें केई भाषाएं च सगंध लैती। लोकसभा दे पैहले ध्याड़े कुल 266 सांसदें सगंध लैती ही ते बाकी सांसदें दे अज्ज सगंध लैने दा कार्यक्रम हा। उत्थे गै राष्ट्रपति द्रौपदी मुर्मू वीरवारें लोकसभा ते राज्य सभा दौनें सदनें दी सांझी बैठक गी संबोधित करंगन।

<><><><><><>

## PM-Naidu

प्रधानमंत्री नरेंद्र मोदी होंरें अज्ज नमीं दिल्ली च साबका उपराश्ट्रपति वेंकेया नायडू हुंदे नै मलाटी कीती। सोशल मीडिया पोस्ट च श्री मोदी होंरें नायडू हुंदे कन्नै दहाकें थमां कम्म करने दे मौकें गी चेता कीता ते भारत दी तरक्की लेई उंदी सूझ-बूझ ते जज्बे दी बड़ेयाई कीती। पिरा दे राज्यपाल इंद्रसेना रेड्डी, छत्तीसगढ़ दे मुखमंत्री विष्णु देव साईं ते उत्तराखंड दे मुखमंत्री पुष्कर सिंह धामी होंरें बी नमीं दिल्ली च प्रधानमंत्री हुंदे कन्नै मुलाकात कीती।

<><><><><><>

## Bangladesh

बांगलादेश दिआं प्रधानमंत्री शेख हसीना होंरें मंगलवारें आखेआ जे उंदी हालिया भारत दी यात्रा मती कामयाब रेई ऐ। एह दौरा लौहका हा, पर मता फायदेमंद हा। शेख हसीना होंरें ढाका च प्रेस कांफ्रेंस च मुकामी मीडिया गी 21-22 जून गी भारत दे अपने राजकीय दौरें दे नतीजे बारे जानकारी दिंदे होई आखेआ जे एह दौरा भारत ते बांगलादेश दे मौजूदा निग्गे सरबंधें गी होर मजबूत करोग।

<><><><><><>

## Jaishankar

चीन दे नमें राजदूत शू-फीहोंग होंरें अज्ज दिल्ली च विदेश मंत्री डॉक्टर एस. जयशंकर हुंदे नै मलाटी कीती। सोशल मीडिया पोस्ट च डॉक्टर जयशंकर होंरें आखेआ जे उनें भारत-चीन दबक्खिया रिश्तें ते एहदे टिकाऊपन ते तरक्की च

सांझे हितें बारै चर्चा कीती। डॉ. जयशंकर होरें चीन दे राजदूत होरें गी उंदे कम्मकाज दे अपने कामयाब समें लेई मुबारक दिती।

<><><><><><>

### Neet

नीट अंडर ग्रेजुएट म्तेहान दे सरबंधे च केंद्र सरकार आस्सेआ पुट्टी गेदी हाल च गें बारै जी.बी पंत सोशल साईस इंस्टीच्यूट इलाहाबाद नै आखेआ ऐ जे शिक्षा मंत्रालय इस मुद्दे गी बड़ी संजीदगी ते सूझ-बूझ कन्नै निब्बड़ा करदा ऐ। उनें लोक परीक्षा अधिनियम दी बी सराहना कीती ते पर्चा लीक होने दे मामले गी निब्बेड़ने गी मता जरूरी दस्सेया। उनें भरोसा जताया जे इस मामले च शामिल सब्बनें दोषिएं गी दण्ड दिता जाग।

<><><><><><>

### Committee-NTA Meeting

राश्ट्रीय परीक्षा एजेंसी एनटीए राएं म्तेहानें गी आजाद निर्पक्ख ते सुचारू करोआने लेई शिक्षा मंत्रालय आस्सेआ कायम माहिरें दी उच्च स्तरीय समिति दी बैठक होई। मीडिया कन्नै गल्ल करदे होई कमेटी दे अध्यक्ष डॉ. के. राधा कृष्णन होरें आखेआ जे समिति दी प्राथमिकता छात्रें ते सुझाएं गी जानना ऐ। एहदे आस्तै उंदे कन्नै गल्लबात कीती जाग। सरकार नै इसरो दे साबका अध्यक्ष डॉ. के. राधा कृष्णन हुंदी अध्यक्षता च माहिरें दी 7 सदस्यीय समिति दा गठन कीता ऐ। समिति मौजूदा प्रक्रियाएं दा मुल्याकंन, सुधार दे सुझा ते एनटीए च साफ ते स्पष्ट भूमिकाएं ते जिम्मेदारिएं गी परिभाषित करोग।

<><><><><><><><>

### Joshi-ISO Meet

उपभोक्ता मामले, खुराक ते सार्वजनिक बंड सरबंधी केंद्री मंत्री प्रहलाद जोशी होरें गन्ने दे टिकाऊ ते विधि उत्पादन आस्तै वैश्विक सहयोग दा आह्वान कीता। दिल्ली च 64मीं अंतरराष्ट्रीय गन्ना संगठन-आईएसओ परिषद दी बैठक दौरान इक कार्यशाला गी संबोधित करदे होई जोशी होरें आखेआ जे कुसै योजना दी अमलावरी करदे होई उपभोक्ता, करसानें ते उद्योग दे हितें च संतुलन कायम करना जरूरी ऐ। उनें कार्यशाला दे सदस्यें गी इक जुट होने दा आग्रहन कीता। उनें घट्ट पानी दे इस्तेमाल ते बद्दोबद्द इस्तेमाल होने आली फसलें दे उत्पादन करने दा आग्रह कीता। मीडिया कन्ने गल्ल करदे होई जोशी होरें मेद जाहिर कीती जे भारत अंतरराष्ट्रीय गन्ना संगठन दी बैठक दी मेजबानी 12 बरे मगरा करा रदा ऐ। इस बैठक च करसानें दे कल्याण उपभोक्ता कल्याण ते पानी दे संरक्षण पर विचारें दा आदान-प्रदान कीता जाग।

<><><><><><><><>

### FM-Pre Budget Meet

वित्त मंत्री निर्मला सीतारमण होरें आँदे आम बजट दा सुझा लैने लेई नमीं दिल्ली च बपार ते सेवा क्षेत्र दे प्रतिनिधिं कन्ने 7मीं बजट थवां पैहले आली बैठक दी अध्यक्षता कीती। बजट थवां पैहले आली विचार-विमर्श सरबंधी बैठक च केंद्री वित्त राज्यमंत्री पंकज चौधरी, मुख्ख आर्थिक सलाहकार वी. अनंत नागेश्वरन, वित्त सचिव टी.वी सोमनाथन ते होर दुए अधिकारी मौजूद हे। कल

खजाना मंत्री होरें बपार ते मजदूर संगठनें दे प्रतिनिधिं कन्नै बजट थवां पैहले आहली बैठक लाई। पिछले हफते वित्त मंत्री होरें सब्बनें राज्यें ते केंद्र शासित प्रदेशें दे वित्त मंत्रिं कन्नै बजट थवां पैहले आहली बैठक कीती ही। उनें करसान संगठनें ते राईबाई सरबंधी अर्थ शास्त्रिं दे प्रतिनिधिं कन्नै बी गल्लबात कीती।

<><><><><><>

### Yatra-Security

29 जून थमां शुरू होने आहली श्री अमरनाथ यात्रा लेई जम्मू दे भगवती नगर च सब्बै तयारियां करी लैती गेदियां न। सुरक्षा सरबंधी इंतजामें बारै गल्ल करदे होई जम्मू दे एसएसपी विनोद कुमार होरें आखेआ ऐ जे सुरक्षा दे सब्बै लोडचदे इंतजाम करी लैते गेदे न ते सब्बनें सुरक्षा एजेंसिं गी थाहरें-थाहरें पर तैनात कीता गेदा ऐ।

<><><><><><>

### ILG-Yatra

लेफ्टिनेंट गवर्नर मनोज सिन्हा होरें अज्ज गांदरबल जिले च श्री अमरनाथ जातरा दे बालटाल बेस कैंप दा दौरा लाया। अपने दौरे दौरान मनोज सिन्हा होरें सुरक्षा दे इंतजामें, दवाइयें, आक्सीजन, पानी, साफ-सफाई ते श्रद्धालुं दे कैंप तगर पुज्जने आहले सब्बनें रूटें दा जायजा लैता।

<><><><><><>

भारतीय मौसम विभाग नै देश दे केई हिस्सें च दक्खण पच्छमी मानसून दे अग्गे बधने लेई हालात साजगार दस्से न। मानसून अगले दऊं थमां त्रै दिनें च गुजरात, मध्य प्रदेश, उत्तर प्रदेश ते उत्तराखंड दे केई हिस्सें च पुज्जी जाग। मौसम विभाग नै अनुमान लाया ऐ जे अगले 5 दिनें च पच्छमी तटीय इलाके च भारी बरखा होई सकदी ऐ। तोआई पच्छिम बंगाल दे हिमालय दे तराई लाहकं ते सिक्कम, असम, मेघालय ते अरुणाचल प्रदेश च इस म्हीने दी 28 तरीक तगर कुते-कुते बरखा होने दी मेद ऐ।

<><><><><><>